



Zatražen pritvor za bivše članove Akrepa

Senka Nožica je u Sudu BiH izjavila kako joj je njen branjenik Šefik Nikšić kazao da u zločinima nad Srbima nije učestvovao

ANJA GRABOVAC-ZVIJERAC

U državnom Sudu jučer je održano ročište o prijedlogu Tužilaštva BiH da se za 13 osumnjičenih zaratne zločine nad žrtvama srpske nacionalnosti na području općine Konjic odredi jednomjesečni pritvor. Nakon ispitivanja osumnjičenih, postupajući tužilac je uputio Sudu BiH prijedlog za određivanje mjere pritvora za sve osumnjičene. Odluka nije donesena do zaključenja ovog izdanja Oslobođenja.

Ometanje istrage

Riječ je o nekadašnjim dužnosnicima struktura Armije BiH, TO i Ministarstva unutrašnjih poslova u Konjicu, koji su osumnjičeni za zločine nad više desetina žrtava srpske nacionalnosti u Bradini, Konjicu i drugim mjestima. Među navedenim zločinima, obuhvaćena su ubojstva, mučenja, silovanja, zlostavljanja i progoni žrtava.

Po nalogu tužioca iz Posebnog odjela za ratne zločine, policijski djelatnici **Državne agencije za istrage i zaštitu (SIPA)** u ponedjeljak ujutro suna području Konjica i drugih mjesta locirali i lišili slobode ukupno 13 osoba, osumnjičenih za kazneno djelo zločina protiv čovječnosti. Oni se sumnjiče za zločine počinjene u proljeće i ljeto 1992. na području Konjica i okoline, a koji su rezultirali uklanjanjem i prisilnim preseljenjem gotovo cjelokupne populacije stanovništva srpske nacionalnosti sa tog područja. Slobode su lišeni Šefik Nikšić (1945), Adnan Alikadić (1962) Mitko Pirkić (rođen 1962), Safaudin Čosić (1974), Muhamed Cakić (1968), Ismet Hebibović, zvani Broćeta (1956), Redžo Balić (1952), Hamed Lukomirak (1971), Almir Padalović (1968), Sead Jusufbegović (1941), Senadin Čibo (1967), Agan Ramić (1962) i Esad Ramić (1966).

Postupajući tužilac Stanko Blagić pritvor je zatražio, kako je jučer obrazložio, zbog osnova sumnje da bi osumnjičeni boravkom na slobodi mogli ometi tok istrage i krivični

postupak, te uticati na svjedoke koji su već dali iskaz, saučesnike i prikrivače, ali i zbog uznemiravanja javnosti. Blagić je kazao da postoji osnovana sumnja da su osumnjičeni počinili ratni zločin protiv stanovništva srpske nacionalnosti 1992. na području Konjica i okolnih mjesta te da sumnja proizlazi iz subjektivnih i materijalnih dokaza, kao i većeg broja saslušanih svjedoka. Dodao je i da Tužilaštvo smatra da je u prijedlogu dostavljeno mnoštvo dokaza te da su među licima srpske nacionalnosti bili djeca i starci nad kojima je, prema Blagićevim riječima, vršeno teško psihičko i fizičko maltretiranje, silovanje, izgladnjivanje i druga nečovječna djela slične prirode. Odbrane osumnjičenih usprotivile su se prijedlogu



Tužilaštvo BiH 13 uhapšenih tereti za ubistva, silovanja, izgladnjivanja...

za određivanje jednomjesečnog pritvora, kazavši da je neosnovan i tražeći da se odrede druge lakše mjere.

Braniteljica prvoosumnjičenog Esada Ramića Vasvija Vidović negirala je da je Ramić bio na čelu Štaba Teritorijalne odbrane, te dodala da on nema nikakve veze sa događajima koji mu se stavljaju na teret. Sam Ramić je rekao da u potpunosti odbacuje

je navode iz optužnice jer, kako je kazao, nije učestvovao ni u kakvom zločinu. Senka Nožica, braniteljica drugoosumnjičenog Šefika Nikšića, koji je bio ratni zamjenik načelnika Službe javne bezbjednosti Konjic, istakla je da joj je njen branjenik rekao da u navedenim događajima nije učestvovao. Ona je ustvrdila i da je hapšenje osumnjičenih produkt pritisaka koji dolaze iz Republike Srpske na Tužilaštvo BiH. Šefik Nikšić je uhapšen po komandnoj odgovornosti, dok su ostali uhapšeni, uglavnom, kao izvršioc zločina. Prema sumnjama Tužilaštva BiH, Midhat Pirkić Mitke ubio je Ratomira Draganića. Pirkić je bio pripadnik diverzantske jedinice Akrepi. Uhapšeni Almir Padalović bio je čuvar u logoru Čelebići. Tužilaštvo ga sumnjiči da je ubio Željka Klimentu, zvanog Keljo. Hamed Lukomirak, zvani Pjevac, također je bivši pripadnik diverzantske jedinice Akrepi. Svjedoci Tužilaštva BiH su potvrdili da je upravo Lukomirak odsjekao uho izvjesnom zarobljeniku Dođiću. I Redžo Balić bio je pripadnik jedinice Akrepi. Njega je još u aprilu ove godine Kantonalni sud u Mostaru osudio na osam godina zatvora zbog ratnog zločina nad konjičkim Srbima. Tužilaštvo BiH je još 2011. godine donijelo naredbu o provođenju istrage protiv više od deset osoba zbog počinjenih ratnih zločina nad žrtvama srpske nacionalnosti u Konjicu.

Nečovječno postupanje

Provođeci istragu o ratnim zločinima na području Konjica, u predmetu Alagić i drugi, Tužilaštvo je došlo do saznanja i dokaza o ratnim zločinima počinjenim nad više desetina žrtava srpske nacionalnosti, kao i osumnjičenim osobama koje se mogu dovesti u vezu sa ovim ratnim zločinima. Prethodno je Tužilaštvo BiH također 2011. podiglo optužnicu protiv Miralema Macića, koji je optužen za ratni zločin protiv srpskog civilnog stanovništva. Prema optužnici, Macić je za vrijeme rata u BiH, kao pripadnik rezervnog sastava tadašnjeg MUP-a

RBiH u Mostaru, u mjestu Bradina učestvovao u nečovječnom postupanju prema civilima srpske nacionalnosti. Macić je prije okončanja postupka preminuo. Tužilac Blagić je kazao da su među žrtvama srpske nacionalnosti bili djeca i starci



Spomenik Srbima ubijenim na Bradini kod Konjica